



老言下

海虞馮武竇



早梅和子大寄武子

日照籬邊雪霽時
陽和未到向南枝
寒香暗度孤山喜
却是東君總未知

盆蘭次和沈子大

綠野徧芳草
徧從空谷移
藥涵山澤氣
香遠蝶蜂
闕淡景緒風
細清暉
曉露遲幽
牕誰最賞
梅冷是
相知

自題行樂圖

戊子年

塵世飛光疾奔走八十二歲已云久陸陸鄉閭春
復秋臯夔許務兩無就畊嫌無力賈不善茅屋破
鐺常自守古人作賦換黃金自捫枵腹一無有鹽
車難上九折坂枯對詩書是師友偶然乘興漁樵
歌何事便思圖不朽年來撒鏡厭衰老友人爲我
畫村叟死心道人等寒灰充耳居士如木偶飢來
啖飯冷披衲畏人不敢多開口天生力命莫相爭
地老天荒不先後乾坤活得一恨人仔細看來殊

覺醜

憶虞山絕頂讀書

地名牛窩潭
冬夏不涸

獨坐巖頭飲巖水一潭清影石齒齒萬籟無聲松
檜深空堂白晝燒松子

長城

祖龍誰道氣如雷活築生民作土灰六國英雄如
草芥却愁青塚馬成堆

數日之內聞麟洲自濟南歸台臣自衛輝
歸不勝狂喜遂成四韻以志桑榆之樂

暮年知己感晨星忽聽歸鄉似夢醒喜氣不期添
飲量闊棕應為歎衰形嚴光暫抱文昌疾沈約長
吟柳惲汀知否敬通多鬱鬱兩賢敢異眼偏青

隱閑庵訪隱青

善岐黃

隘巷藏僧舍翛然隱者居但教佛地靜便與市塵
踈藥味君臣在詩情意象餘賣醫兼賣字已足代
經鋤

偶成三首

八十過頭久從前步步非耳聾知事少年老見人

稀藥石非吾急食眠與眾違兀然精力盡妄想欲
何歸

無米日中起桂薪猶待炊埽階留蟻垤啓戶斷蛛
絲蠹簡嗜還在豬肝恥見知健忘年長病急寫夢
中詩

身世亦何與無懷自坐忘老來嫌視短病後覺更
長桂葉露如洗松花風亦香平安過此日明日再
商量

水災荅友人慰問

莫言多壽似喬松老去多忘又耳聾百尺竿頭危
又險三更燭跋雨兼風兒孫謀食從星散妻女遭
荒久病中木偶幸能逢至友殘編相對泣塗窮

歲荒客牕見新月

客邸日將暝開牕見玉鉤一絲雖旋沒應照舉家
愁

文子拉往天龍菴看桂花值雨口占二絕

句兼呈天若慧聞二開士

八樹覆城東金風促遊履入門叢碧深一雨濃香

止

零露滴餘馥秋枝生緒風開牕對支遁茗話入玄

中

枕上作

眼底芸然總是空來無踪跡去如風年逾八十成
何事贏得人稱尚在翁

郡城遇舍弟衷蘅志喜三十韻

吾祖憲副公特發自中都陳情啓聖聰恩綸許歸
虞太守繼其武甲第聲三吳憲副誕叔子後裔遷

姑蘇南野別小宗子姓漸繁敷屈指四世久音書
兩地乎自從鼎革後家運與國俱園廬各星散墓
木亦彫枯慶弔兩不聞相見昧稱呼嗚呼二百載
衰榮如此夫今當歲戊子馬齒八十逾偶應吾友
招托迹寄吳趨適逢袁蘅弟執手於通塗歷詢諸
父輩俱向九原徂淒涼昔門楣一片皆荒蕪郡城
並虞山彫零亦相符祖德豈衰替孫謀多顛愚欲
別不忍分垂淚但長吁吾弟拉我歸治具不須臾
昆弟悉至止公卿滿座隅琴書充棊案右史而左

圖開筵面秋光親故恕禮踈情話悅心耳忘機醕
清醕醉餘勉矍鑠不藉藜杖扶桑榆多悱惻此日
竟歡娛嗟余雖志學老去鬼揶揄幸有諸昆在尚
可振前模勉旃善自愛教子以操觚富貴雖有命
青氈且業儒努力績祖業庶幾慰區區

次和鄧尉探梅未與寄同遊之作

每憶鄧尉梅如良友久曠屢夢醉雪林兀焉自頽
放今春幸近之香風遠輕颺吾友特相邀共破胥
江浪策杖湖山間陟高欣四望豈知老龍鍾力憊

非高尚遐想諸君子見花神淡宕白玉飛枯礪綠
煙籠步障蘭陵賢主人二備亦同訪但選苔蘚坐
何須書畫舫遊人雨霽多愛向松根傍行廚遠道
寒枯枝恣遠掠胸戰飲興豪酒深反惆悵坐久欲
更遷片片飛相向佳人額上裝增妍謝郢匠樹底
反照明花外車百輛嗟余愁卧孤聊賞少文嶂烹
泉一兩清茗芋亦酣暢勝遊豈無期太息梅花帳
多事未與客妬羨兩難忘示余妬遊篇瑤華情蕩
漾

壽同庚周季美

二老生同八十逾豈知力命有榮枯花開君子香
猶在畫似公孫迹已無早韭晚菘園有味餐英采
秀志何迂思君身世今公理偏我多愁老向隅

九日自述

一龕容膝便爲家數卷秋風亂似麻白首懶從落
帽飲羞將短髮見黃花

向燈有感

星辰原自古猶今入世紛紛入夢深鳳蠟莫矜能

繼日成灰也只似余心

雙泉看月

已得居心比淨僧清光坐照漸孤昇雙泉止水兩
團雪萬里青雲一片冰大地儘教澄似海虛堂却
稱座無燈鵲驚燕寢非吾事但喜臨書見細蠅

睡效黃陳體

斯鄉安此軀安穩不可誣得酒便欲倒飲茶猶未

甦少事方甚足不夢更無吾干日劉玄石八百陳

南圖我方在黑甜慎莫相喚呼

或曰古來只有陳圖南安有陳南圖

笑應之曰押韻而已

戊子大水紀事八首

有序

余自丁卯生迄今戊子歲已八十二矣自有知
識以來凡大兵大疫大水大旱大寒大暑以至
蜚蝗為災青螟食稻所歷至再至三困苦艱難
備嘗之矣今五月間正當插蒔未遍霖雨浹旬
江南低下之田悉沈水底民不聊生不意年登
大耋又遭此厄耳聞目見不勝惻然逐日口占
略無倫次雖非雅音聊以供采風之歎悼而已

舊歲遭荒旱，畝中米莫存。如何今又水，啼哭遍荒村。

晴空一點墨，行雨遍天涯。只道新秧沒，誰知水到家。

拾得浮來草，晴天晒作薪。且留客伴醉，不計自家貧。

過船遙乞火，無米更憂攢。行竈牽舟放，撈萍煮共餐。

蘆壁風吹去，廚中浪拍天。坐牀濯兩足，就枕即橫

眠

逢人嗟菜色，見米似珍珠。茆屋一宵盡，傷心數篋

書

聞道夏秋稅，王言早免征。如何遭大水，部議又重

行

大孝又逢此，天公太不情。憂來迫欲醉，不待濁醪

清

題章雲階行樂圖

蘇臺茂苑多產高人，黃村珠林賢裔彬彬。今茲展

卷一見閭閻足遍天涯歸老隱淪清泉白石安坐
離塵貌腴以德容悅以神喬松根畔藉草爲茵不
冠不帶露頂呈身雲階章叟今之先民

次和武子寒山對雨

香雨一山桂開軒心曠然遙峰眉尚斂寒澗腹疑
堅松濕添孤翠鐘微出暮煙僧攜秋谷茗相向煮
甘泉

再和

披雲啓松戶爐火得風然是鳥睡皆穩非禪坐亦

堅雨深金墜粟山暮日生煙更約僧晨起同探瀑
布泉

壽鶴癯法師

自覓山隅老檜林堂堂明月到如今三千梵網六
時密百八輪珠一念深教在不須臨濟喝藝成誰
見右軍心人間甲子纔週遍末法還期振德音

送南潯董義三學博温州訓導二十六韻

先王治天下曰惟養與教養則重農功教則敦學
校普天設類宮崇儒而重道成人咸有德小子亦

有造經經與緯史恪恭聽師教所業是典籍所重
是忠孝濟濟逢掖徒束脩各自好入效古聖賢出
可居廊廟春弦夏誦勤如霧養文豹所以風化淳
操之有其要後代尠真儒宮牆等虛號銓衡循例
選師職多衰老士風漸澆漓綱常誰引導師既爲
具文士又安則做何幸董夫子青年德彌劭南潯
閔閔家世德遠克肖早膺東甌師秉鐸宣明詔靈
運有餘徽右軍曾嘯傲君子舊風流可以壹靜躁
金玉品既醇學術邃難料明道不計功祖訓素所

紹天台鴈蕩間山水秋清峭名邦得良師斯文更
振掉下孚多士心上待明廷召風勁覺錚錚教成
看慥慥翼爲吾黨光老言用相告

蔣星來七十

塞門荆棘絕塵埃帶醉微吟獨把盃春半紫茄兼
白苧秋初芡嘴與梨頤心期卷內千年蠹生事籬
邊一樹梅待看詩成逾放老齒如編貝背如鮐

詠南燭

四首

一叢紅子小山隅獨皸寒空衆草枯滯穗並垂攢

火齊高枝擎出碎珊瑚始疑燭淚迎風瀉更訝梅
椒得雨麤淅淅嚴風擁爐坐雪深偏愛綠雲扶
顆顆珠圓映燭光不辭霜雪綴餘芳神仙童子收
遺穗擎向丹山餉鳳凰

珊瑚起網軟堪接數串丹珠綴玉柯衆鳥不知巢
鳳處銜來無路到山阿

石家燭淚寒未銷紅豆迎冬擁深雪琉璃盛水浸
香杭製作青精勝玉屑

和僧如六十自壽

家永叔自號

老不求仙釋不僧閑將逸興託詩笏開懷獨酌成
高卧默坐無心是上乘中饋何人炊半菽一編有
子伴孤燈世間多少青雲客賦就幽居子却能

庭梅盛開恰逢連宵風雨感而賦此

飽經冰雪到如今始放微香見苦心誰道天公亦
相妬一旬風雨剩空林

不肯芳郊襯馬蹄孑然籬畔自淒淒當年落地還
如雪今日方開旋作泥

蘇城少年春景小照

四顧桃花閒柳枝神全氣足好丰姿煙光晴美當
春日正似人生年少時

蒙莊齊物等榮枯爭識愁城與險塗曲水斜川難
久敘不如獨坐自歡娛

技成直繼虎頭癡巖電看如欲動竒他日相逢成
一笑免教生客使人疑

吳王遺迹逞風流走馬山坡且暫休細向蠻箋看
君貌堂堂深羨富春秋

次和從姪念修七十自述八首

簷外蜂衙日兩朝辛勤釀蜜總全消便宜老病常
高枕得意雲山獨掛瓢竊笑英雄寒射獵靜從麋
鹿友漁樵憑君努力居東海老看鞭成架海橋
自性奚分秀與能總教無事便如僧也知不必非
母必却道何曾勝未曾六道三生兀爾過九霄一
撈忽然登七旬爭似人貪睡蟻鬪牀頭萬馬騰
陽九生逢慘莫留興言家國正虔劉可憐冠蓋成
村里未比狐狸得首丘巢破幸存完殼卵家傳猶
是擁書侯竹林大小非同阮並製荷衣珮玉舟

三雅愁來盡五經茅堂堪喚醉翁亭尋思萬卷能
高擁未到燕然擬勒銘對泣牛衣頭並白入身鍼
孔眼誰青中山酒力原來薄轉眼三年却又醒
祖宗方伯德何賒易代猶能號世家燕翼一經風
並雅畔繇千場飀兼瓜人心久歷山川險天道難
期日月華倚杖門前秋水淨細看魚戲荇交加
由他蜂蝶撲簾衣新燕雕梁喜學飛挾策兔園煙
舍去看花梵宇水村歸傳聞時事非余意名教心
期與世違叩戶早知詩友至牕前一榻接玄暉

彫零家緒正艱難團聚兒孫亦甚歡學作畊漁行
踽踽強充糠覈體藥藥居饒蠹簡人多誚坐右湘
筵自覺寒蓮幕絳帷江左客靜看朱戶競加餐
清漣藻荇澗南濱寒翠風光老逸民曬腹有書君
尚富撐腸無字我何貧篇章秀潤青丘子雅韻清
和李德新家學淵源吾老矣好傳書種及斯辰

自題小照

僧衣儒履道人巾歷盡三災剩此身滄海日昇空
望曉騰騰八十夢難真

題西谷太史臘梅畫筴

同是寒梅不傍籬長條葉盡附叢枝
兕觥深注黃流後金磬輕粘麴粉時
霜雪牕前朝日早琉璃屏外晚香遲
誰爲釀蜜兼鎔蠟蘊德含芳蝶不知

送文子北上應試

豹隱余安老鵬飛君去遙
兩年欣莫逆獨返更無聊
高步重霄穩雄文壯志驍
臨行更執手努力事

唐堯

隆冬如老景陰雲天四垂
暮年一知我相聚幾多

時君今戒行旅齋裝將北之揚鞭
泰山下良友並開眉豈知負暄叟
南榮更與誰

男兒志四方慷慨向金臺
日邊今在望寧復首重迴
趁此年少日決起如春雷
雪霰安足畏東風不日來

客塗非曩日天心相吉人醴甘
雖適口當與德爲鄰行止信有命
君子善守身佇聽好音至慰我歧
望頻

聞省菴春闈之捷志喜二首

引領京闈早得名雞窠聞捷喜兼驚年華冠帶春
秋富文體箕裘甲第榮紫宇芝眉遲識面沈詩任
筆已先聲嗟余末契曾相託寧憇田間一老生
樹德門庭善積深發榮無盡見天心丰神出格人
中傑才穎成章海內欽神雀賦呈比美玉青錢選
中似南金日邊遠在山川外安得盃鐺共勸斟
月夜懷文子下第南歸
悵望燕臺路迢迢良友踈君雖六月息我已八旬
餘還軫計程近交綏入夢虛淒清今夜月獨照柳

邊廬

和九山家貧撐柱過凶年五首

有序

余生第二已丑馬齒八十有三矣吳越之民因
丁亥之大旱又戊子之大水以迄於今困於飢
荒不可名狀加之以疫癘兼之以盜竊米珠薪
桂十室九空蕩析離居家無煙火至有舉家卧
疾而乏食者亦有連邨疫死而莫殮者亦有勉
力種植而飢病不支或死喪相繼殯殮無策即
以青苗售人醫得眼前不顧他日者傷心慘目

通撰
十五
寶和堂
所不忍言吾友馬九山惕於見聞惴惴乎逢天
殫怒之是懼偶讀陸務觀家貧撐柱過凶年之
句即用其成語次第賦成今體七言五章家白
菴孫去華起而和之動成卷軸其所以警天裁
悲民隱憂絕糧之意畢見於斯讀之泫然泪下
真有仍叔家甫之遺風焉余暮年值此傷感更
多竊以君子遇裁而懼側身修行則今茲災疢
是亦錘鍊吾人一大鑪鞴也不揆蕪陋輒爲繼
聲雖既老狂言有倍風雅而幽懷所抒不辭鄙

里以貽三君子開函一太息云

家貧撐柱過凶年歷盡諸艱總任天
鄙儉兩頤含飯返陽城永日屑榆眠
耕漁生計真迂叟書史忘飢豈散仙
努力杜門旬日雨嗟來義不受人憐
一把茆遮坐半廬家貧撐柱過凶年
蟻珠似雨何如米榆莢成堆不是錢
莫便飢驅叩人戶任教薪盡斷炊煙
妻兒細語殊堪厭生死由他豈怨天
三災過盡死灰然又杖枯藤餓草間
日暮情懷難適意家貧撐柱過凶年
燒金煮石原無效鵠面鳩

形劇可憐二六時中頻自省相爭力命讓誰先
舊歲吾鄉水拍天迄今絕食更憂煎人生惟有各
安分活計無如聽自然筭老精強當阨運家貧撐
柱過凶年兒孫相戒過鄰里獨抱遺經枕臂眠
積尸原隰痛哀然何事生辰不後先鈇鉞往時威
震疊氛禳此際疫纏縣人來菜色兼蓬首鼠去空
廚絕暝煙剩有子遺同鬼燐家貧撐柱過凶年

咏鴻遠庭中盆荷

我聞華山頂池水開青蓮花開香四遠花根大如

船今此瓦缸內清波如鏡圓栽荷甚芳潔擎蓋亦
遮天托身有大小質性本同然人從西岳來勿笑
葉如錢素非耳目玩人情愛田田

吳祠八景

古柳

陶家植五株千載令人憶却笑金城柳宣武空歎
息

永樂窩

同是空山窩安樂異永樂命名若殊趨旨意同憺

怕

短垣

牆短不遮山到此得名向長安競崇墉安知雲月
曙

隙圃

世間種菜手舍此去何之月中閑田地却令生桂
枝

西潭

勺水浮鏡天蛟龍於此睡發源自崑崙狂瀾不東

逝

綠遶堤

煬帝愛如畫縈紆皆柳綠何如遶水堤曳杖看山
腹

望雲橋

清溪跨斷虹十里墮山松白雲遥睇久馬鬣一堆
封

片石峯

虞仲來居此山靈得令名豈知千載後直作一祠

屏

己丑七夕

分飛兒女歎伶仃獨向秋河自涕零迴憶往年當
此夕浮瓜沈李拜雙星

題婁東樊君無根墨牡丹 名永

玉肌拂粉豔如璫獨殿深春待特恩誰識樊君有
殊意祇須珍賞不須根

次和支遠庚寅元旦漫興

曉起晨光新更優家家兒女進珍羞杖頭簷矮常

妨步梅下冠高最易勾爆竹鄉間煙際鬧桃符邨
戶兩前綢老人不會誇時樣重整荷衣戴遠游

再疊前韻

耳畔紛紜却似優交乘榮辱歎包羞尋梅屐齒香
加健求友鶯聲語暗勾歲月任他隨我長谿山不
負與心綢偶然水齋逢僧坐拉近茶鐺敘素游

三疊前韻

位置諸天斗室優散花空抱革囊羞也知四大千
重障早把三生一筆勾凜冽鍾鬪威勢大挪揄窮

鬼舊情綢匡牀此日容高卧藏息原來是勝游

題西谷蘭花薔薇扇

幽谷芳姿霜下身誰將織刺護輕塵風流太史心

無著筆底生香醒世人

題張成九挾彈圖

盤馬無心愛綠苔攜弓雅步覓詩材偶然想著驪

龍餌立取泥丸待燕來

不顧遙峯瀑布竒金丸輕握戲平陂年來吳下飢

寒甚莫向春郊賺小兒

為喜晴天任所之獨遊心曠自神怡弓聲虛下驚

何鳥陡起成行白鷺鷥

一羣如墨起平灘疑是神鳥不敢彈萬仞高桐雛

鳳遠回頭却顧小青鸞

題張香圃小照

昔宋治平初有張祠部敏叔先生者風裁學行

瀟灑出塵為吳中第一流人物其題集清軒詩

云洗竹放教風自在傍溪看得月分明一時傳

誦以為竒警香圃豈其苗裔歟余未識香圃從

雙泉案頭睹香圃之容如見叔敏焉露頂跂足
盤桓坡上洵乎三吳清淑之氣必有所鍾君殆
其人乎哉因賦如面之意以發景企之私云

雨洗高桐晴更綠風天萬里曠空谷獨將遠意睇
遙空不著纖埃到雙目科頭偃仰氣春容石髮坡
前好坦腹問渠腹中何所有中郎錦段量充足回
頭莫怪向西笑馥馥秋香發輦轂

留贈破山秋明和尚

三藏勘師授五燈亦已微旅泊三界內遑遑無所

歸偶吟常尉句來叩古禪扉山光鳥性閒曳杖獨
依依吾師坐其中綠照松竹輝仰觀河漢轉俯視
塵沙飛可知此人世識者亦云希飢來無竒策緊
束青竹皮

同孫方平入破山訪曾孝廉漢瞻知藏師

藥山

招提不到已多年喜共興公訪舊緣得接紫眉無
盡話子輿儒術藥山禪

破山寺曉起

曉起東峯日已紅高岡齊立古長松鶯聲未到山
門靜且喜遊人尚絕踪

贈蔡九霞

會上耆英盡率真中郎風格屬君身月中吟罷知
難和醉後書成似有神自與桓榮飲西序何須仲
武作東鄰斗南無限才華地屈指應推第一人

小桃源

花源非仙境境靜心乃安鳥去一山在花開獨自
看醉深天地窄卧後針芥寬逸老既得地菜羹勸

加餐

陸忍菴八十

久從花縣想才猷會向中塗值細侯輿衛褰帷過
上國兒童騎竹擁前頭東山欲遂初心樂北麓難
教壯志休十五松根茶正熟除書旋見貴林丘

其二

新祀臨川煥撫州可知司馬最風流筵前顧曲憐
同調海內遺芳藉更留未竟一斑隨解印且看半
刺勝通侯八旬自得家園趣積善孳孳老不休

梅遊雜咏

并記

海虞馮武竇伯

余生第二庚寅春馬齒已八十有四矣貧病殘
軀重過吳門訪我蘭陵文子適山僧聞先至云
山梅莫過今歲策杖來遊此正其時文子即時
命駕邀其令弟武子暨沈子子大與余余不堪
步履令小兒守謙持杖相隨凡五人詣胥江乘
舟西邁經橫塘泊木瀆舍舟登陸道經樂飢園
訪韓覺庵玩園亭之勝牡丹之富縱觀所藏法

書名畫皆真蹟新構三層樓若陶隱居紆曲雅
步盡泉石竹木之致日浦肩輿抵臯峯有蘭陵
氏之別業焉少憇月上主人導同遊上竹木岡
進耐久園觀飲馬池池在山中水浩瀚深不可
測相傳是吳王飲馬處環池皆高阜高與山等
阜之上建枕流亭翼然竦峭下坡出阜外則水
與亭俱不可見蓋地近靈巖巖即吳宮故址意
吳王蓄軍於此不使越人知也是宵月圓候月
正中露微下宿僧牕花香月色俱至牕下樂甚

不能寐曉起筍輿復至舟泊舟鄧尉山下院進
山一路悉從梅花下過求其無花處不可得無
香處尤不可得登寺樓臺殿閣裏萬花中日欲
暮不盡其勝抵竺山山故蘭陵氏之先隴雙泉
先生馬鬣在焉太湖如明鏡諸峯拱峙柏松槐
檟迴異尋常殆一山之巨觀與是夕宿丙舍舍
之西有分雲亭四面皆牕牕外皆梅如素霞初
起如積雪未消令人坐卧不忍去亭以外一水
泓然小梅頰清波如幽人韻士別出衆花外翼

晨竺山發軔登萬峯臺向名石樓墩甚高銳有大石可坐四顧潭東潭西驚魚澗斗柄觜銅坑石井查山綠浮閣錢家坎董墳諸勝處並在目前坐久至瞻雲閣百里梅花綠山麓遶湖濱宛如一帶輕綃嫋嫋娉娉斷斷續續續紛無盡令人叫絕不能贊一詞至湖波深曲處得小庵戶外高臺可以休息屋後石壁入雲似劒門竹樹森然昔憨山大師避地結茆處也再前行過七十二峯閣文康塚墓一片蔓草荒煙不勝今昔

之感云又前行經山坳輿人云是五色梅花椿地多種梅矮不盈尺一本異色根如百歲皆寄生他枝殊無自然之竒也舍之復返竺山主人曰觀止矣然祇是陸地觀耳何如水中遥睇爲更竒也因上漁舟放太湖中望所經行處皆白雲如帶遠束山腰青松積翠頂從白雲透出梵刹鐘聲漁歌欸乃微風不動身在鏡中瞻眺久之復上山浴於湯池回首煙凝山紫循湖香徑若帶微曛返至宿處屈指已四日矣人生樂事

無以逾此焦禿餘生更爲多幸請各賦詩紀遊
勉以糠粃先導時白庵舍弟亦在蘭陵齋中以
事不得偕往爲寫梅遊圖以當卧遊之意筆細
景空比於少文更爲適也簡緣老人自識

胥江放櫂

昨得山僧報梅開正在今萬峯皆雪麓百里接瓊
林芳信登舟興香風策杖心江濤侵曉渡唱和幾
知音

樂飢園訪韓覺庵廿八韻

今歲庚寅春欣從探梅友汲汲望山行泊舟古胥
口我友爲余言此間有韓叟是余所親知其門可
往叩策杖入門來如向洞天走始入中庭寬散步
亦良久魏紫與姚黃徧地如葱韭再入曲而深十
洲更二酉案頭三代物地植名花藪愈精而愈微
次第列左右上不遜平泉下不數虎阜主人笑謂
余君但止此否不棄隘陋居尚有別開牖更啓葳
蕤鎖重拂麟鬚帚新構樓三層遺製貞白授牕橫
放遙峯棐几無塵垢清風曠遠景古拙愛尊卣坐

久意欲別山花看恐後主人又謂余君何急培塿
君知世所無不知吾所有法書兼名畫平生所株
守鍾王蘇米黃玉軸未觸手黃鶴子久唐寫來已
大壽一一出相示勝於玩瓊玖人生此見聞遭逢
必非偶我生八十四不負此胡者捉筆記勝遊興
劇忘老醜人傳地亦傳韻語亦不朽

初入山

盛
籃輿魚貫行鼓我尋梅興却喜到山時梅花正全

月
入山訪古梅恰當月未缺既看山中梅又看山中
看花人已老花開梅尚少口占二韻詩萬樹花含
笑

宿耐久僧舍

萬樹梅花萬疊山五人贏得共閒閒逢僧拉共僧
牕坐落盡梅花始放還

吳王飲馬池

上有耐久園枕流亭
皆雙泉先生遊玩處

看花發棹抵木瀆日斜來就僧房宿僧房却在臯

峯下蘭陵丙舍標新目額題耐久棟宇新更結林
亭傍山麓山麓深藏千頃池吳王萬馬於斯浴蘭
陵主人愛此水引我高岡上竹木岡名團團策杖繞
池行龍睡深溪鶴在谷吳王兵勢震燕齊驪黃牝
牡選所服牧馬空山人不知千軍力殫開平陸我
來不聞隻馬聲但見蘭陵構此亭上向危巒下臨
水一山松檜鳥嚶嚶

翼晨從臯峯抵竺山

貪看香發不知疲得意忘言縱所之行盡梅花數

十里更尋別嶺一株奇

塗中口號

湖邊山足是伊家一望如雲未有涯努力飽餐期
看盡閑思得句忘塗賒只須月上何須酒不見枝
橫但見花水部孤山俱已矣美人高士亦長嗟

鄧尉觀梅

不惜措筇到上方素雲疊疊聚僧房貌應似我寒
兼瘦性愛如君冷又香坐久不辭烹椀茗心清爭
復憶壺觴日斜徐向山村去飛上白頭添鬢霜

蘭陵丙舍作

吾生與梅結深緣神清骨勁入夢眠每當春仲獨
淒寂不見梅花空悵然今年幸入蘭陵坐蘭陵主
人與我語梅開莫過郡西山山家各各依梅住撥
擢太湖艤湖曲舍舟扶杖共登陸筍輿曲折入山
村百里低迷香斷續興到神飛便向前進得薊林
儼似仙三日身裹萬花醉行住坐卧皆香煙侵晨
踏露看花笑枝枝如笑復如憐回頭却與主人道
不如及早歸與好忍見狂飈一旦起紛紛吹入湖

縹緲

分雲亭看梅小飲

湖遶諸峯梅遶莊小亭團飲氣清涼山穀貴買鮮
加美家醞遠攜味更長水定一池明瘦影牕開四
面納微香漁舟欲上重回首爭到明春再酌量

亭外池邊小梅一株幽芬可愛翫而賦之

一株籬落外別自向南榮水暎清且淺露晞香更
明凭闌相對久獨立一身輕遊子愛全盛安知自
守貞

登萬峯臺次子大韻

鳥道如絲路屈盤。高峯四望萬峯寬。梅聯山麓松
加翠。日浸湖心晝亦寒。暫脫籃輿履險易。老憑藜
杖下坡安。誰家樓閣花深處。却似遊人脚底看。

遊石壁憨山大師結茆避地處雙泉先生

題額湖東精舍

行過湖濶湖曲深。憨山隱處松竹林。高臺石壁凌
空際。湖東新額雙泉心。遊人安坐高臺久。起看石
壁驚欲走。巨靈一劔劈何年。小立茆庵同不朽。石

門文字克繼先德。徽驚動慈聖后。我爲尋梅得至
斯。瞻仰龍象若星斗。一陣香風何自來。催上肩輿
到前阜。

過五色梅花椿廿六韻

凡物生兩間。所貴在自然。何況花中梅。清貞純任
天。今歲花事佳。晴美勝往年。吾友鼓遊興。拉我萬
峯巔。不惜舟車費。攜樽徧山川。清風數十里。馥馥
如雲煙。峯腰皆束素。山足踐芝田。遙觀擁松頂。近
玩明且鮮。眼中千萬樹。花密蝶翩翩。樹老結子稀。

山家多去焉。所貴老醜枝。摧折如拘孿。一經俗人
手。暮景不復全。輿中三歎息。勝事多迤邐。行到山
之坳。僕夫告履穿。停足詢山路。云是梅椿邊。入門
縱四顧。梅矮大如拳。一本五色殊。寄生豈能堅。山
家向余語。欲買擇所妍。諦視更增慨。此是人力專。
但欲娛人眼。誘取悅者錢。所貴梅之品。閱世經百
千。冷落無人處。義不受人憐。世間天豔種。尚非我
所賢。何爲藉人力。使人見異遷。回頭語同伴。亟令
肩輿前。豈無虯龍枝。獨老向林泉。

登七十二峯閣

顧文康公建於墓所

相業煙消墓木薪。高樓猶在歎斯人。一湖似鏡明
千頃。萬樹如雲聚半春。世事年深同幻影。薌林日
射更精神。憑闌不盡登臨景。七十二峯遶水濱。

太湖泛舟

出花入花花滿空。上山下山風底松。舍陸登舟綠
無際。七十二嶺香濛濛。放櫂湖心更叫絕。山腰束
素如盤龍。近覩稱竒遠逾好。日斜山紫花微紅。東
南巨區八百里。峯峯倒浸平如砥。鐘鳴梵刹似催

歸幾片魚鱗鋪綠水

虎山橋返棹

虎山橋畔共登舟
四日晴和縱使遊
百里花光漸無望
淡餘香氣未全收

其二

無雨無風香更賒
來時方盛去長嗟
衰殘值此頻回首
不是看花是別花

腹存藁

并序

海虞馮武竇伯

已午二載客於鄉城之間
事多拂意略無好懷
間有所作輒過而不留也
獻歲發春寄居村圃
閑庭寂然偶憶向時吟咏
有顯顯然不能忘棄
者抽之腹笥僅錄一二以誌感歎
云爾
己未正朝自記

咏書六韻

萬卷擁布衣
便期尊百城
微言思乃得
異本校方

精借去茫難省鈔來倍有情
蠹殘香可悅墨印古
加明四部籠分類三冬浪得名
可知貞白叟愛此
勝長生

旅店逢異人

龍箠冠髮赤玉舟釣船白浪打羊裘
歛扉雪夜吟
石鼎曳杖蛟門弄礪虬默坐雲巖九州小小睡酒
肆千日休一點客星杳孤往不犯帝座犯牽牛

哭確庵師

百里茫茫古蔚村一燈高燄照乾坤
絳帷未捲如

聞語總帳空懸欲斷魂未把蒼生登壽域誰將學
者入人門辦香不敢從儕輩自反綈袍拭淚痕

和婁江費天來五十自述四首 次韻

半生駒隙杳難追悟得無爲亦是爲
春樹暮雲聊
自感論文舒歎每愆期貧來空見彫胡秀老去愁
聽謝豹啼安得茆齋風雨夜衰翁相對訴深卮
牢落乾坤剩草廬眼看塵世漸丘墟年華已去思
筇杖嗜好何存愛異書詩酒有情多悵恨田園無
累莫歛歔阿誰來叩江村戶偏惱羲皇一夢餘

蠻觸爭雄早合休紛紛霜雪漸蒙頭可知性海原
何限應識空王莫與儔坐隱行吟聊自放黑甜白
墮更誰尤十年踪跡三秋水葭莢蒼茫何處求
多君善自祝長生讀罷名篇祇自驚陶令醒來猶
有誠尚平婚後更無情春花春鳥姿堪寫秋水秋
山賦易成慚愧星霜先一度師門還憶占君行

余同學
於蔚村

送家補之北遊

芳露草芊芊秋風吹琴川一去三千里連枝四十

年清水交君子白玉師聖賢古淡吾家學休令聽
者眠

雪中作

風吹大片度龍山攪亂乾坤頃刻間一箇漁翁渾
不管釣竿簑笠向溪灣

聞華伯訃

知己又彫落一身日漸孤笑言猶未遠涕淚向誰
枯曉夢艱難盡春花運命殊平生嘲訕者到此亦
長吁

賦得樹樹皆秋色

押秋字

誰變林臯色飄零處處秋
空村清水映遠岫白雲
留二月花爭似三更露
欲流潘安驚易老宋玉
遍生愁榆莢金風盡桐香
璧月收一筇踈影下無地
不堪遊

雪夜

已亥年作

浙浙寒窓夜更明
空庭深積悄無聲
曉來大地皆如玉
只有清溪一縷清

尚公招隱村莊樂與晨夕未幾尚公去余

猶棲遲於此莊之主人爲莘田翁也賦

此寄謝兼簡莘田

偶棹輕舸過輞川
愛渠幽隱足林泉
伯通廡下猶閑在
便負琴書共醉眠

割宅風流久未聞
多君相約共耕耘
開軒坐看過秋雨
漠漠輕煙鷺一羣

不解憂貧不趁時
釣磯風颺鬢邊絲
鷓鴣自乏圖南志
但向深林借一枝

縹緲虛舟任所如
卓錫無地可爲廬
謝公若慰蒼

生望權借東山讀異書

錄舊詩有感

逆旅從來有去時紛紛力命莫相疑余生五十纔
過二大半吟成哭友詩

題斧季哭華伯詩後

自渠初沒到如今惟我和君最痛心幾度欲賡腸
斷句爲余腸斷不成吟

寓圃
十首

寓圃無窮勝兼宜傍水鄉開畦憎瓦礫栽芟當衣

裳映柳川加綠涵花地亦香有誰來叩戶怪我老
漁莊

東皇何自到池畔柳絲絲疎雨隨風急輕雷出地
遲煙開新菜甲雪放老梅枝一夢華胥後鶯啼宛
舊時

一水縈村墅春深事事奢銜花新燕壘摘菜富蜂
衙醉喜清陰轉慵看白日斜不知兒女意何事更
傷嗟

無欲身強健披衣趁曉光珠圓花上露玉碎草頭

霜芟竹開新逕編籬補壞牆朝朝忙未了何暇計
炎涼

春歸曾幾日卉木更交加綠暗聽鸝柳紅稀夢蝶
花少嘗玄石酒多長邵平瓜兩歇陂池滿乘間早
漚麻

每愛瀕湖住今來野外廬煙收茆屋小風起竹林
踈人說天官義家傳月令書此中饒古意不羨武

陵居

謝却貧寒慮茆齋即十洲清泉烹雀舌絳蠟寫蠅

頭撫局嫌僧遠因花想谷幽偶然欣得句欲睡不
能休

早過知非日村居歲又殘柳傷徒老大竹喜向平
安地迴風聲厲牆高日影寒遙峯餘雪在曳杖獨
吟看

久傍田家住誰爲足穀翁乍晴愁更雨初暖幸無
風兩稅辛勤後三時憂喜中芹莖與萍子聊以慰
哀鴻

素得遠鶴市今來掃鹿場席門長不掩草閣自生

涼日遠松筠秀風微蕙芷香水村真足老且喜任
踈狂

懷薛孝穆時客秦中

與君相聚不多時便向秦關覓所知一箇人歸應
幾日三千里外欲何爲還書兩度無從荅得夢連
宵祇自疑旅邸情懷何似也可知無復見驕兒君去
後連喪二子

重展竹溪八友圖有感并序

歲己亥余舊居有水竹之勝瞿氏昆仲曰師周

曰有仲翁氏昆仲曰搢瞻曰寶林暨錢子梅仙
趙子令卿毛子奏叔與余共八人春秋佳日來
集於此定交武安王像前有霜雪依然風雨共
之之約時脫略形骸觴咏竟日甚樂也石谷爲
寫竹溪八友圖先師確庵顧而笑曰汝輩即不
逮七賢亦可方六逸未幾令卿搢瞻相繼即世
有仲走滇南自是廢斤輟弦無復向時之樂矣
今有仲亦化爲異物寶林置身青雲梅仙往來
毘陵奏叔隱於岐黃其窮老林泉時相晤對者

惟師周與余兩人而已重展此圖不勝聚散存
歿之感吟寄諸君子同一太息也

一生行止與君同已信人間萬事空猶有一情空
不得共將存歿痛衰翁

師周

一水茫茫隔萬端形骸誰遣阻交歡追思往日連

牀話始信人生聚首難

梅仙

不是雲泥有異趨從來出處各爲途憑誰寄語山

公道莫過當年舊酒罏

寶林

總角看君又二毛圍碁鬪茗各分曹而今往事皆

成夢自向蘭蓀誦楚騷

秦叔

醉鄉淳寂淡無痕好向花前盡一樽莫道吾生猶

有待八人贏得五人存

自謂

寄明節族父

不向人間覓要津武丘西畔老遺民衣冠自昔連
三世齒德而今剩一人樽酒強消陵谷恨硯田難
慰子孫貧兵荒兩地艱謀面珍重衰年困守身

次和念修早秋寄懷

才過盛夏又秋生却似天心亦世情原草輕陰連

廢殿井梧踈影下空城
縹緜障露風加健
活竹編籬圍易成
修綆得泉欣抱甕
匡牀盃茗看雲橫

次韻荅公斂

長向壺中置此身
壺中誰過話窮塵
粗評酒味誰先熟
細較花期孰殿春
風閣琴書恒作伴
水亭魚鳥自相親
村頭略約通漁路
十里煙波願結鄰

新晴訪簡緣於湖
莊劇談置酒即事贈言

瞿鼎建 公斂

蕭然高寄一閑身
滿架新詩賴辟塵
檻外名花

疑解語牀頭醴酒半
藏春談深永日幾忘暮坐
久薰風漸覺親學圃
相將同結隱邵平且喜接
芳鄰

自歎

五十餘年愁病身
不堪凶歲更長貧
炊來米盡如新債
索得書歸似故人
只仗苦吟消永日
也將生計等前塵
蕭蕭短髮成何事
自向秋風歎不辰

檢故紙得先師確庵夫子贈言
有時危覺

汝賢之語不禁泫然追和其意

敢蹈樊須轍苟全惟力耕妻兒苦交適僮僕倨相
輕簑笠衣冠舊詩書事業生此身終茹蘗不累我
師明

竇伯以農事歸寄示

確庵

竭盡書生力躬耕二畝田
麥愁庭潦沒糠作杖
藜然計拙全吾道時危覺汝賢
誰知鷗鷺畔一笠破溪煙

訪浣風和尚

小築依山麓門開一徑遐
金風吹落葉翠竹映黃

花欲問徒相累無言亦起瑕
飽餐香積罷且吃趙州茶

訪孝穆止宿

精廬山麓下微雨叩門遲
蒲筍清齋罷文章靜夜思
芸香饒古意竹影借鄰枝
莫惜頻燒燭難教擬後期

孫十一郎哀詞二章

孝維子

夙惠偏能重所思忽忽塵世見無期
虛窻夜月增惆悵不見明珠掌上時

依依臨別更牽裾荆玉長埋一夢虛七載恩深緣
未盡再來重讀未完書

歲丁未覲庵五十初度與退山有倡和之
作長篇險韻各逞所能若紀昌飛衛之
不少下也余不揆蕪陋亦爲繼聲距今
丁巳又十改歲矣覲庵年已杖鄉人生
吃緊事不可不早自料理重疊前韻寄
之以當相勗之義覲庵有道者豈以不
善頌禱而置之乎

人生苦纏縛不離根塵識薰習最悞人可朱亦可
墨靈光本卓然何事多岐術莫起取舍心即爲能
事畢門庭各自殊其源總歸一但能脫所依微心
安用七余當梅花時獨步虞山側坐看陸陸儔名
利競通塞如君闔兩扉終歲湛文筆既不與世競
其中已超逸若不見所見徒入聖人室但看相續
心來往紛如織道岸匪易登內視必綿密緩火鍊
姪女急管調箴策功深緩急間妙用在無息冷灰
忽豆爆天外頭可出祇期究自性勿問宗南北余

年過半百衰白行可即了知淺陋胸不藉文辭飾
君今方杖鄉彈指即杖國貧老日相煎如禾生百
騰太倉雖有粟非余所可食巍巍軒冕途不老亦
不得兒孫熾而昌非我所檢助麗藻動春暉徒爲
後賢式只有觀河智朗朗如昔日循業自發見何
待見彌勒化人本是幻衣珠原未失獨立古乾坤
騰騰誰與匹以此祝君壽此壽庶無極

